

發菩提心經論

天親菩薩造

鳩摩羅什譯



發菩提心經論

天親菩薩造 三藏法師鳩摩羅什譯

1	勸發品	2
2	發心品	3
3	願誓品	6
4	檀那波羅蜜品	8
7	5 尸羅波羅蜜品	10
6	6 羼提波羅蜜品	12
7	7 毘梨耶波羅蜜品	14
8	8 禪那波羅蜜品	15
9	9 般若波羅蜜品	18
10	10 如實法門品	19
11	11 空無相品	21
14	12 功德持品	23

南無本師釋迦牟尼佛

自歸於佛 當願眾生 紹隆佛種 發無上意
自歸於法 當願眾生 深入經藏 智慧如海
自歸於僧 當願眾生 統理大眾 一切無礙

發菩提心經論

1 勸發品

敬禮無邊際 去來現在佛 等空不動智 救世大悲尊

有大方等最上妙法，摩得勒伽藏菩薩摩訶薩之所修行。所謂：勸樂修集無上菩提，能令眾生發深廣心；建立誓願，畢定莊嚴；捨身命財，攝伏貪恚；修五聚戒，化導犯禁；行畢竟忍，調伏瞋癡；發勇精進，安止眾生；集諸禪定，為知眾心；修行智慧，滅除無明；入如實法門，離諸執著。宣示甚深空無相行，稱讚功德，使佛種不斷。有如是等無量方便助菩提法清淨之門，當為一切上上善欲分別顯示，悉令究竟阿耨多羅三藐三菩提。

諸佛子！若佛子受持佛語，能為眾生演說法者，應先稱揚佛之功德。眾生聞已，乃能發心求佛智慧。以發心故，佛種不斷。

若比丘、比丘尼、優婆塞、優婆夷，念佛念法，又念如來。行菩薩道時，為求法故，阿僧祇劫受諸勤苦。以如是念，為菩薩說法，乃至一偈。菩薩得聞是法，示教利喜，當種善根，修習佛法，得阿耨多羅三藐三菩提。為斷無量眾生無始生死諸苦惱故，菩薩摩訶薩欲成無量身心，勤修精進，深發大願。行大方便，起大慈悲。求大智慧，無見頂相。求如是等諸佛大法，當知是法，無量無邊。法無量故，福德果報亦復無量。

如來說言：如諸菩薩最初發心，下劣一念，福德果報，百千萬劫說不能盡。況復一日一月一歲，乃至百歲，所習諸心，福德果報，豈可說盡！

何以故！菩薩所行無盡，欲令一切眾生，皆住無生法忍，得阿耨多羅三藐三菩提故。

諸佛子！菩薩初始發菩提心。譬如大海。初漸起時，當知皆為下中上價，乃至無價如意寶珠，作所住處，此寶皆從大海生故。菩薩發心亦復如是。初漸起時，當知便為人、天、聲聞、緣覺、菩薩、諸佛，一切善法，禪定智慧，之所

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

生處。

復次，又如三千大千世界。初漸起時，當知便為二十五有。其中所有一切眾生，悉皆荷負，作依止處。菩薩發菩提心亦復如是。初漸起時，普為一切無量眾生，所謂：六趣四生。正見邪見，修善習惡，護持淨戒，犯四重禁，尊奉三寶，謗毀正法。諸魔外道、沙門、梵志、剎利、婆羅門、毘舍首陀，一切荷負作依止處。

7 復次，菩薩發心，慈悲為首。菩薩之慈，無邊無量。是故，發心無有齊限，等眾生界。

譬如虛空，無不普覆。菩薩發心亦復如是。一切眾生，無不覆者。如眾生界無量無邊，不可窮盡。菩薩發心亦復如是，無量無邊無有窮盡。虛空無盡故，眾生無盡。眾生無盡故，菩薩發心，等眾生界。眾生界者，無有齊限。我今當承聖旨，說其少分。東方盡千億恒河沙阿僧祇諸佛世界，南西北方四維上下各千億恒河沙阿僧祇諸佛世界，盡末為塵。此諸微塵，皆不與肉眼作對。百萬億恒河沙阿僧祇三千大千世界所有眾生，悉共聚集，共取一塵。二百萬億恒河沙阿僧祇三千大千世界所有眾生，共取二塵。如是展轉，取十方各千億恒河沙阿僧祇諸佛世界所有地種，微塵都盡，是眾生界，猶不可盡。

譬如有人，析破一毛，以為百分。以一分毛，滴大海水。我今所說眾生少分亦復如是。其不說者，如大海水。假使諸佛於無量無邊阿僧祇劫，廣演譬喻，說亦不盡。菩薩發心，悉能遍覆如是眾生。

云何，諸佛子！是菩提心，豈可盡也！若有菩薩聞如是說，不驚不怖，不退不沒，當知是人，決定能發菩提之心。假令無量一切諸佛於無量阿僧祇劫，讚其功德，亦不可盡。

何以故？是菩提心，無有齊限，不可盡故。有如是等無量利益，是故宣說，為令眾生普得受行，發菩提心。

2 發心品

菩薩云何發菩提心？以何因緣修集菩提？若菩薩：①親近善知識，②供養諸佛，③修集善根，④志求勝法，⑤心常柔和，⑥遭苦能忍，⑦慈悲淳厚，⑧深心平等，⑨信樂大乘，⑩求佛智慧。

若人，能具如是十法，乃能發阿耨多羅三藐三菩提心。

復有四緣，發心修集無上菩提。何謂為四：

- ①思惟諸佛，發菩提心。
- ②觀身過患，發菩提心。
- ③慈愍眾生，發菩提心。
- ④求最勝果，發菩提心。

思惟諸佛，復有五事：

- (1)思惟：「十方過去未來現在諸佛，初始發心，具煩惱性，亦如我今。終成正覺，為無上尊。」以此緣故，發菩提心。
- (2)思惟：「一切三世諸佛，發大勇猛，各各能得無上菩提。若此菩提是可得法，我亦應得。」緣此事故，發菩提心。
- (3)思惟：「一切三世諸佛，發大明慧，於無明轂中，建立勝心，積集苦行，皆能自拔，超出三界。我亦如是，當自拔濟。」緣此事故，發菩提心。
- (4)思惟：「一切三世諸佛，為人中雄，皆度生死煩惱大海。我亦丈夫，亦當能度。」緣此事故，發菩提心。
- (5)思惟：「一切三世諸佛，發大精進，捨身命財，求一切智。我今亦當隨學諸佛。」緣此事故，發菩提心。

觀身過患，發菩提心，復有五事：

- (1)自觀我身，五陰四大，俱能興造無量惡業，欲捨離故。
- (2)自觀我身，九孔常流臭穢不淨，生厭離故。
- (3)自觀我身，有貪瞋癡無量煩惱，燒然善心，欲除滅故。
- (4)自觀我身，如泡如沫，念念生滅。是可捨法，欲棄捐故。
- (5)自觀我身，無明所覆，常造惡業，輪迴六趣，無利益故。

求最勝果，發菩提心，復有五事：

- (1)見諸如來，相好莊嚴，光明清徹，遇者除惱。為修集故。
- (2)見諸如來，法身常住，清淨無染。為修集故。
- (3)見諸如來，有戒定慧解脫解脫知見，清淨法聚。為修集故。
- (4)見諸如來，有十力四無所畏大悲三念處。為修集故。
- (5)見諸如來，有一切智，憐愍眾生，慈悲普覆，能為一切愚迷正導。為修

集故。

慈愍眾生，發菩提心，復有五事：

- (1)見諸眾生，為無明所縛。
- (2)見諸眾生，為眾苦所纏。
- (3)見諸眾生，集不善業。
- (4)見諸眾生，造極重惡。
- (5)見諸眾生，不修正法。

(1)無明所縛，復有四事：

- 1.見諸眾生，為癡愛所惑，受大劇苦。
- 2.見諸眾生，不信因果，造作惡業。
- 3.見諸眾生，捨離正法，信受邪道。
- 4.見諸眾生，沒煩惱河，四流所漂。

(2)眾苦所纏，復有四事：

- 1.見諸眾生，畏生老病死，不求解脫，而復造業。
- 2.見諸眾生，憂悲惱苦，而常造作，無有休息。
- 3.見諸眾生，愛別離苦，而不覺悟，方便染著。
- 4.見諸眾生，怨憎會苦，常起嫌嫉，更復造怨。

(3)集不善業，復有四事：

- 1.見諸眾生，為愛欲故，造作諸惡。
- 2.見諸眾生，知欲生苦，而不捨欲。
- 3.見諸眾生，雖欲求樂，不具戒足。
- 4.見諸眾生，雖不樂苦，造苦不息。

(4)造極重惡，復有四事：

- 1.見諸眾生，毀犯重戒，雖復憂懼，而猶放逸。
- 2.見諸眾生，興造極惡五無間業，兇頑自蔽，不生慚愧。
- 3.見諸眾生，謗毀大乘方等正法，專愚自執，方起憍慢。
- 4.見諸眾生，雖懷聰哲，而具斷善根。反自貢高，永無改悔。

(5)不修正法，復有四事：

1. 見諸眾生，生於八難，不聞正法，不知修善。
2. 見諸眾生，值佛出世，聞說正法，不能受持。
3. 見諸眾生，染習外道，苦身修業，永離出要。（永不出離）
4. 見諸眾生，修得非想非非想定，謂是涅槃。善報既盡，還墮三塗。

菩薩見諸眾生，無明造業，長夜受苦，捨離正法，迷於出路。為是等故，發大慈悲，志求阿耨多羅三藐三菩提，如救頭燃。一切眾生有苦惱者，我當拔濟令無有餘。

諸佛子！我今略說初行菩薩緣事發心，若廣說者，無量無邊。

3 願誓品

菩薩云何發趣菩提？以何業行成就菩提？發心菩薩住乾慧地，先當堅固發於正願，攝受一切無量眾生。我求無上菩提，救護度脫，令無有餘，皆令究竟無餘涅槃。是故，初始發心，大悲為首。以悲心故，能發轉勝十大正願。

何謂為十？

- ①願我先世及以今身所種善根，以此善根，施與一切無邊眾生，悉共迴向無上菩提。令我此願，念念增長。世所生，常繫在心，終不忘失，為陀羅尼之所守護。
- ②願我迴向大菩提已，以此善根，於一切生處，常得供養一切諸佛，永必不生無佛國土。
- ③願我得生諸佛國已，常得親近隨侍左右，如影隨形，無剎那頃遠離諸佛。
- ④願我得親近佛已，隨我所應，為我說法，即得成就菩薩五通。
- ⑤願我成就菩薩五通已，即能通達世諦假名流布，解了第一義諦如真實性，得正法智。
- ⑥願我得正法智已，以無厭心，為眾生說，示教利喜，皆令開解。
- ⑦願我能開解諸眾生已，以佛神力，遍至十方無餘世界，供養諸佛，聽受正法，廣攝眾生。
- ⑧願我於諸佛所受正法已，即能隨轉清淨法輪。十方世界一切眾生，聽我法者，聞我名者，即得捨離一切煩惱，發菩提心。
- ⑨願我能令一切眾生發菩提心已，常隨將護，除無利益，與無量樂。捨身命

財，攝受眾生，負荷正法。

⑩願我能負荷正法已，雖行正法，心無所行。如諸菩薩，行於正法，而無所行，亦無不行。為化眾生，不捨正願。

是名發心菩薩十大正願。

此十大願遍眾生界，攝受一切恒沙諸願。若眾生界盡，我願乃盡，而眾生界實不可盡，我此大願亦無有盡。

7 復次，布施是菩提因，攝取一切諸眾生故。持戒是菩提因，具足眾善，滿本願故。忍辱是菩提因，成就三十二相、八十隨形好故。精進是菩提因，增長善行，於諸眾生勤教化故。禪定是菩提因，菩薩善自調伏，能知眾生諸心行故。智慧是菩提因，具足能知諸法性相故。

取要言之，六波羅蜜是菩提正因。四無量心、三十七品，諸萬善行，共相助成。

若菩薩修集六波羅蜜，隨其所行，漸漸得近阿耨多羅三藐三菩提。

14 諸佛子！求菩提者，應不放逸。放逸之行，能壞善根。若菩薩制伏六根不放逸者，是人能修六波羅蜜。

菩薩發心，先建至誠，立決定誓。立誓之人，終不放逸懈怠慢緩。

何以故？立決定誓，有五事持故：①能堅固其心。②能制伏煩惱。③能遮放逸。④能破五蓋。⑤能勤修行六波羅蜜。

如佛所讚：

如來大智尊 顯說功德證 忍慧福業力 誓願力最勝

21 云何立誓？

若有人來，種種求索。我於爾時，隨有施與，乃至不生一念慳悋之心。若生惡心如彈指頃，以施因緣求淨報者，我即欺誑十方世界無量無邊阿僧祇現在諸佛。於未來世，亦當必定不成阿耨多羅三藐三菩提。

若我持戒，乃至失命，建立淨心，誓無改悔。

若我修忍，為他侵害，乃至割截，常生慈愛，誓無恚礙。

28 若我修精進，遭逢寒暑王賊水火師子虎狼無水穀處，要必堅強其心，誓不退沒。

若我修禪，為外事所燒，不得攝心，要必繫念在境，誓不暫起非法亂想。

若我修集智慧，觀一切法如實性，隨順受持。於善不善，有為無為，生死涅槃，不起二見。

若我心悔恚癡，退沒亂想，起於二見如彈指頃，而以戒、忍、精進、禪、智求淨報者，我即欺誑十方世界無量無邊阿僧祇現在諸佛。於未來世，亦當必定不成阿耨多羅三藐三菩提。

菩薩以十大願，持正法行。以六大誓，制放逸心。必能精勤修集六波羅蜜，成阿耨多羅三藐三菩提。

4 檀那波羅蜜品

云何菩薩修行布施？布施若為自利、利他，及二俱利，如是布施，則能莊嚴菩提之道。

菩薩為欲調伏眾生令離苦惱，是故行施。修行施者，於己財物，常生捨心。於來求者，起尊重心，如父母、師長、善知識想。於貧窮、下賤，起憐愍心，如一子想。隨所須與，心喜恭敬，是名菩薩初修施心。

修布施故，善名流布。隨所生處，財寶豐盈。是名自利。

能令眾生心得滿足，教化調伏，使無慳吝。是名利他。

以己所修無相大施，化諸眾生，令同己利。是名俱利。

因修布施，獲得轉輪王位，攝受一切無量眾生，乃至得佛無盡法藏。是名莊嚴菩提之道。

施有三種：①以法施，②無畏施，③財物施。

以法施者，勸人受戒，修出家心。為壞邪見，說斷常四倒眾惡過患，分別開示真諦之義。讚精進功德，說放逸過惡。是名法施。

若有眾生，怖畏王者、師子虎狼、水火、盜賊，菩薩見已，能為救護。名無畏施。

自於財物，施而不吝，上至珍寶、象馬車乘、繒帛、穀麥、衣服、飲食，下至麁糲、一縷之縵，若多若少，稱求者意，隨所須與。是名財施。

財施，復有五種：①至心施，②信心施，③隨時施，④自手施，⑤如法施。

所不應施，復有五事：

①非理求財，不以施人，物不淨故。

②酒及毒藥，不以施人，亂眾生故。

③罝羅機網，不以施人，惱眾生故。

④刀杖弓箭，不以施人，害眾生故。

⑤音樂女色，不以施人，壞淨心故。

7 取要言之，不如法物，惱亂眾生，不以施人。自餘一切，能令眾生，得安樂者，名如法施。

樂施之人，復獲五種名聞善利：

①常得親近一切賢聖。 ②一切眾生，之所樂見，③入大眾時，人所宗敬。

④好名善譽，流聞十方。⑤能為菩提作上妙因。

菩薩之人，名一切施。一切施者，非謂多財，謂施心也。

如法求財，持以布施，名一切施。

以清淨心，無諂曲施，名一切施。

14 見貧窮者，憐愍心施，名一切施。

見厄苦者，慈悲心施，名一切施。

居貧少財，而能用施，名一切施。

愛重寶物，開意能施，名一切施。

不觀持戒毀戒、田非田施，名一切施。

不求人天妙善樂施，名一切施。

志求無上大菩提施，名一切施。

21 欲施、施時歡喜、施已不悔，名一切施。

若以花施，具陀羅尼七覺花故。

若以香施，具戒定慧熏塗身故。

若以果施，具足成就無漏果故。

若以食施，具足命辯色力樂故。

以衣服施，具清淨色，除無慚愧故。

以燈明施，具足佛眼，照了一切諸法性故。

28 以象馬車乘施，得無上乘，具足神通故。

以纓絡施，具足八十隨形好故。

以珍寶施，具足大人三十二相故。

以筋力僕使施，具佛十力、四無畏故。

取要言之，乃至國城、妻子、頭目手足，舉身施與，心無憊惜，為得無上菩提，度眾生故。

菩薩摩訶薩修行布施，不見財物、施者、受者，以無相故。是則具足檀那波羅蜜。

5 尸羅波羅蜜品

云何菩薩修行持戒？持戒若為自利、他利，及二俱利，如是持戒，則能莊嚴菩提之道。

菩薩為欲調伏眾生，令離苦惱，是故持戒。修持戒者，悉淨一切身口意業。於不善行，心能捨遠，善能呵嘖惡行毀禁。於小罪中，心常恐怖。是名菩薩初持戒心。

修持戒故，遠離一切諸惡過患，常生善處，是名自利。

教化眾生，令不犯惡，是名利他。

以己所修向菩提戒，化諸眾生令同己利，是名俱利。

因修持戒，獲得離欲，乃至漏盡，成最正覺，是名莊嚴菩提之道。

戒有三種：①身，②口，③心。

持身戒者，永離一切殺盜淫行，不奪物命、不侵他財、不犯外色。

又，亦不為殺等因緣及其方便，不以杖木瓦石傷害眾生。

若物屬他，他所受用，一草一葉，不與不取。

又亦未嘗眄眦細色，於四威儀，恭謹詳審。

是名身戒。

持口戒者，斷除一切妄語、兩舌、惡口、綺語，常不欺誑、離間和合、誹謗毀訾、文飾言辭、及造方便惱觸於人。

言則至誠，柔軟忠信。言常饒益，勸化修善。

是名口戒。

持心戒者，除滅貪欲、瞋恚、邪見。常修軟心，不作過罪。信是罪業，得惡

果報。思惟力故，不造諸惡。於輕罪中，生極重想。設誤作者，恐怖憂悔。於眾生所，不起瞋惱。見眾生已，生愛念心。知恩報恩，心無慳悋。樂作福德，常以化人。常修慈心，憐愍一切。是名心戒。

是十善業戒，有五事利益：①能制惡行，②能作善心，③能遮煩惱，④成就淨心，⑤能增長戒。

若人善修不放逸行，具足正念，分別善惡，當知是人，決定能修十善業戒。八萬四千無量戒品，悉皆攝在十善戒中。是十善戒，能為一切善戒根本。斷身口意惡，能制一切不善之法，故名為戒。

戒有五種：①波羅提木叉戒，②定共戒，③無漏戒，④攝根戒，⑤無作戒。白四羯磨，從師而受，名波羅提木叉戒。

根本四禪，四未到禪，是名定共戒。

根本四禪，初禪未到，名無漏戒。

收攝諸根，修正念心，見聞覺知色聲香味觸，不生放逸，名攝根戒。

捨身後世，更不作惡，名無作戒。

菩薩修戒，不與聲聞、辟支佛共。以不共故，名善持戒。善持戒故，則能利益一切眾生。

持慈心戒，救護眾生，令安樂故。

持悲心戒，忍受諸苦，拔危難故。

持喜心戒，歡樂修善，不懈怠故。

持捨心戒，怨親平等，離愛恚故。

持惠施戒，教化調伏諸眾生故。

持忍辱戒，心常柔軟，無恚癡故。

持精進戒，善業日增，不退還故。

持禪定戒，離欲不善，長禪支故。

持智慧戒，多聞善根，無厭足故。

持親近善知識戒，助成菩提無上道故。

持遠離惡知識戒，捨離三惡八難處故。

菩薩之人，持淨戒者，不依欲界，不近色界，不住無色界，是清淨戒。

捨離欲塵，除瞋恚癡，滅無明障，是清淨戒。

離斷常二邊，不逆因緣，是清淨戒。

不著色受想行識，假名之相，是清淨戒。

不繫於因，不起諸見，不住疑悔，是清淨戒。

不住貪瞋癡三不善根，是清淨戒。

不住我慢、憍慢、增上慢、慢慢、大慢，柔和善順，是清淨戒。

利衰、毀譽、稱譏、苦樂，不以傾動，是清淨戒。

不染世諦虛妄假名，順於真諦，是清淨戒。

不惱不熱，寂滅離相，是清淨戒。

取要言之，乃至不惜身命，觀無常想，生於厭離。勤行善根，勇猛精進，是清淨戒。

菩薩摩訶薩修行持戒，不見淨心，以離想故，是則具足尸羅波羅蜜。

6 羼提波羅蜜品

云何菩薩修行忍辱？忍辱若為自利、他利，及二俱利，如是忍辱，則能莊嚴菩提之道。

菩薩為欲調伏眾生，令離苦惱，故修忍辱。修忍辱者，心常謙下一切眾生。剛強憍慢，捨而不行。見麤惡者，起憐愍心。言常柔軟，勸化修善。能分別說瞋恚和忍果報差別。是名菩薩初忍辱心。

修忍辱故，遠離眾惡，身心安樂，是名自利。

化導眾生，皆令和順，是名利他。

以己所修無上大忍，化諸眾生，令同己利，是名俱利。

因修忍辱，獲得端正，人所宗敬，乃至得佛上妙相好，是名莊嚴菩提之道。

忍辱有三，謂身口意。

云何身忍？若他加惡，侵毀撻打，乃至傷害，悉能忍受。見諸眾生，危逼恐懼，以身代之，而無疲怠。是名身忍。

云何口忍？若見罵者，默受不報。若見非理來呵嘖者，當軟語附順。若有加誣，橫生誹謗，皆當忍受。是名口忍。

云何意忍？見有瞋者，心不懷恨。若有觸惱，其心不亂。若有譏毀，心亦無

怨。是名意忍。

世間打者，有二種：①實，②橫。

若有罪過，若人嫌疑，為彼所打，自應忍受，如服甘露。於彼人所，應生恭敬。所以者何？善能教誡調伏於我，令我得離諸過罪故。

若橫加惡傷害於我，當自思惟：「我今無罪，當是過去宿業所招。」是亦應忍。

7 復應思念：「四大假合，五眾緣會，誰受打者。」

又，觀前人，如癡如狂，我當愍之，云何不忍。

又，罵者亦有二種：①實，②虛。若說實者，我應生慚。若說虛者，無豫我事。猶如響聲，亦如風過，無損於我，是故應忍。

14 又，瞋者亦爾。他來瞋我，我當忍受。若瞋彼者，於未來世，當墮惡道，受大苦惱。以是因緣，我身若被斫截分離，不應生瞋。應當深觀往業因緣，當修慈悲，憐愍一切。如是小苦，不能忍者，我即不能自調伏心，云何當能調伏眾生，令得解脫一切惡法成無上果？

若有智人，樂修忍辱。是人，常得顏貌端正，多饒財寶。人見歡喜，敬仰伏從。

復當觀察：若人，形殘，顏色醜惡，諸根不具，乏於財物。當知皆是瞋因緣得。

以是因緣，智者應當深修忍辱。

21 生忍因緣有十事：①不觀於我及我所相，②不念種姓，③破除憍慢，④惡來不報，⑤觀無常想，⑥修於慈悲，⑦心不放逸，⑧捨於飢渴苦樂等事，⑨斷除瞋恚，⑩修習智慧。

若人能成如是十事，當知是人能修於忍。

菩薩摩訶薩，修於清淨畢竟忍時。若入空、無相、無願、無作，不與見覺願作和合，不倚著空無相無願無作。是諸見覺願作皆空，如是忍者，是無二相。是名清淨畢竟忍也。

28 若入盡結，若入寂滅，不與盡結生死和合。不倚盡結寂滅，諸結生死皆空。如是忍者，是無二相。是名清淨畢竟忍也。

若性不自生，不從他生。不和合生，亦無有出不可破壞。不可壞者，是不可盡。如是忍者，是無二相。是名清淨畢竟忍也。

無作非作、無所倚著、無分別、無莊嚴、無修治、無發進，終不造生。如是忍者，是無生忍。如是，菩薩修行是忍時，得受記忍。

菩薩摩訶薩，修行忍辱，性相盡空，無眾生故。是則具足羼提波羅蜜。

7 毘梨耶波羅蜜品

云何菩薩修行精進？精進若為自利、他利，及二俱利。如是精進，則能莊嚴菩提之道。

菩薩為欲調伏眾生，令離苦惱，故修精進。修精進者，於一切時，常勤修集清淨梵行，捨離怠慢，心不放逸。於諸艱難不饒益事，心常精勤，終不退沒。是名菩薩初精進心。

修精進故，能得世間出世間上妙善法，是名自利。

教化眾生，令勤修善，是名利他。

以己所修菩提正因，化諸眾生令同己利，是名俱利。

因修精進，獲得轉勝清淨妙果，超越諸地，乃至速成正覺，是名莊嚴菩提之道。

精進有二種：①為求無上道故，②廣欲拔濟眾生苦，而起精進。

菩薩成就十念，乃能發心勤行精進。云何十念？

①念佛無量功德。②念法不思議解脫。③念僧清淨無染。

④念行大慈，安立眾生。⑤念行大悲，拔濟眾生苦。⑥念正定聚，勸樂修善。

⑦念邪定聚，拔令反本。⑧念諸餓鬼飢渴熱惱。⑨念諸畜生長受眾生苦。

⑩念諸地獄備受燒煮。

菩薩如是思惟十念，三寶功德我當修集，慈悲正定，我當勸勵。邪定眾生，三惡道苦，我當拔濟。如是思惟，專念不亂。日夜勤修，無有休廢。是名能起正念精進。

菩薩精進，復有四事。所謂修行四正勤道：①未生惡法，遮令不生。②已生惡法，速令除斷。③未生善法，方便令生。④已生善法，修滿增廣。

菩薩如是修四正勤道，而無休息，是名精進。

是勤精進，能壞一切諸煩惱界，增長無上菩提正因。

菩薩若能受於一切身心大苦，為欲安立諸眾生故而不疲倦，是名精進。

菩薩遠離惡時諂曲邪精進已，修正精進。所謂修信施戒忍定慧慈悲喜捨，欲作已作當作，至心常行，精進無悔。於諸善法，及拔濟眾苦。如救頭然，心不退沒。是名精進。

菩薩雖復不惜身命，然為拔濟眾苦，救護正法，當應愛惜。不捨威儀，常修善法。修善法時，心無懈怠。失身命時，不捨如法。是名菩薩修菩提道勤行精進。

懈怠之人，不能一時，一切布施。不能持戒，忍於眾苦，勤行精進，攝心念定，分別善惡。是故，說言「六波羅蜜，因於精進，而得增長。」若菩薩摩訶薩精進增上，則能疾得阿耨多羅三藐三菩提。

菩薩發大莊嚴，而起精進，復有四事：①發大莊嚴，②積集勇健，③修諸善根，④教化眾生。

云何菩薩發大莊嚴？於諸生死，心能堪忍，不計劫數。於無量無邊百千萬億那由他恒河沙阿僧祇劫，當成佛道，心不疲倦。是名不懈莊嚴精進。

菩薩積集勇健而起精進。若三千大千世界滿中盛火，為見佛故，為聞法故，為安止眾生於善法故，要當從是火中而過。為調伏眾生，心善安止於大悲中。是名勇健精進。

菩薩修習善根而起精進。如所發起一切善根，悉以迴向阿耨多羅三藐三菩提，為欲成就一切智故。是名修習善根精進。

菩薩教化眾生而起精進。眾生之性，不可稱計，無量無邊，同虛空界。菩薩立誓：「我當度之，無有遺餘。」為欲化度，勤行精進。是名教化精進。

取要言之，菩薩修助道功德，助無上智慧。修集佛法，而起精進。諸佛功德無量無邊，菩薩摩訶薩發大莊嚴所行精進，亦復如是無量無邊。

菩薩摩訶薩修行精進無離欲心，拔眾苦故。是則具足毘梨耶波羅蜜。

8 禪那波羅蜜品

云何菩薩修習禪定？禪定若為自利、他利，及二俱利。如是禪定，則能莊嚴菩提之道。

菩薩為欲調伏眾生，令離苦惱，故修禪定。修禪定者，善攝其心。一切亂想，不令妄干。行住坐臥，係念在前。逆順觀察，髑髏、項脊、臂肘、胸脇、髕髀、脛踝，安般數息，是名菩薩初修定心。

修禪定故，不受眾惡，心常悅樂。是名自利。

教化眾生，令修正念，是名利他。

以己所修清淨三昧離惡覺觀，化諸眾生令同己利，是名俱利。

7 因修禪定，獲得八解，乃至首楞嚴金剛三昧，是名莊嚴菩提之道。

禪定由三法生。云何為三？①從聞慧。②從思慧。③從修慧。從是三法，漸漸而生一切三昧。

云何聞慧？如所聞法，心常愛樂。復作是念：無礙解脫等諸佛法，要因多聞而得成就。作是念已，於一切求法時，轉加精勤。日夜常樂聽法，無有厭足。是名聞慧。

14 云何思慧？思念觀察一切有為法如實相。所謂無常、苦、空、無我、不淨。念念生滅，不久敗壞。而諸眾生憂悲苦惱憎愛所繫，但為貪恚癡火所然，增長後世苦惱大聚。無有實性，猶如幻化。見如是已，於一切有為法，即生厭離。轉加精勤，趣佛智慧。思惟「如來智慧，不可思議，不可稱量。有大勢力，無能勝者。能至無畏安隱大城，不復轉還。能救無量苦惱眾生。」如是，知見佛無量智。

見有為法無量苦惱，志願進求無上大乘，是名思慧。

云何修慧？從初骨觀，乃至阿耨多羅三藐三菩提，皆名修慧。

21 離欲不善法，有覺有觀，離生喜樂，入初禪。滅覺觀，內清淨，心一處，無覺無觀，定生喜樂，入二禪。離喜故行捨，心念安慧，身受樂，諸賢聖能說能捨，常念受樂，入三禪。斷苦斷樂故，先滅憂喜故，不苦不樂行捨念淨，入四禪。過一切色相，滅一切有對相，不念一切別異相故，知無邊虛空，即入虛空無色定處。過一切虛空相，知無邊識，即入無色識定處。過一切識相，知無所有，即入無所有無色定處。過一切無所有處，知非有想非無想，安隱即入無色非有想非無想處。但隨順諸法行故，而不樂著。求無上乘，成最正覺，是名修慧。

28

菩薩從是聞思修慧，精勤攝心，則能成就通明三昧禪那波羅蜜。

復次，菩薩修定，復有十法行，不與聲聞、辟支佛共。何等十？

①修定，無有吾我，具足如來諸禪定故。

②修定，不味不著，捨離染心，不求己樂故。

③修定，具諸通業，為知眾生諸心行故。

④修定，為知眾心，度脫一切諸眾生故。

⑤修定，行於大悲，斷諸眾生煩惱結故。

⑥修定，諸禪三昧，善知入出，過於三界故。

⑦修定，常得自在，具足一切諸善法故。

⑧修定，其心寂滅，勝於二乘諸禪三昧故。

⑨修定，常入智慧，過諸世間，到彼岸故。

⑩修定，能興正法，紹隆三寶，使不斷絕故。

如是定者，不與聲聞、辟支佛共。

復次，為知一切眾生煩惱心故。是故，修集諸禪定法，助成住心。令此禪定住平等心。是名為定。如是等定，則等於空無相無願無作。空無相無願無作等者，則眾生等。眾生等者，則諸法等。入如是等，是名為定。

復次。菩薩雖隨世行，不雜於世。捨世八法，滅一切結，遠離憒鬧，樂於獨處。菩薩如是修行禪定，心安止住，離世所作。

復次，菩薩修定，具諸通、智、方便、慧故。

云何為通？云何為智？若見色相，若聞音聲，若知他心，若念過去，若能遍至諸佛世界，是名為通。若知色即法性，解了音聲心行，性相寂滅三世平等，知諸佛界同虛空相而不證滅盡，是名為智。

云何方便？云何為慧？入禪定時，生大慈悲，不捨誓願，心如金剛。觀諸佛世界，莊嚴菩提道場，是名方便。其心永寂，無我無眾生，思惟諸法，本性不亂，見諸佛界同於虛空，觀所莊嚴同於寂滅。是名為慧。

是名菩薩修行禪定，通、智、方便、慧故差別。四事俱行，得近阿耨多羅三藐三菩提。

菩薩摩訶薩修行禪定，無餘惡心，以不動法故。是則具足禪那波羅蜜。

9 般若波羅蜜品

云何菩薩修習智慧？智慧若為自利、他利，及二俱利，如是智慧，則能莊嚴菩提之道。

菩薩為欲調伏眾生，令離苦惱，故修智慧。修智慧者，悉學一切世間之事，捨貪瞋癡，建立慈心，憐愍饒益一切眾生，常念拔濟為作將導。能分別說正道邪道及善惡報。是名菩薩初智慧心。

修智慧故，遠離無明，除煩惱障，及智慧障，是名自利。

教化眾生，令得調伏，是名利他。

以己所修無上菩提，化諸眾生令同己利，是名俱利。

因修智慧，獲得初地，乃至薩婆若智，是名莊嚴菩提之道。

菩薩修行智慧，有二十心能漸建立。何謂二十？

①當發善欲，親近善友心。 ②捨離憍慢，不放逸心。

③隨順教誨，樂聽法心。 ④聞法無厭，善思惟心。

⑤行四梵行，修正智心。 ⑥觀不淨行，生厭離心。

⑦觀四真諦，十六聖心。 ⑧觀十二因緣，修明慧心。

⑨聞諸波羅蜜，念欲修集心。 ⑩觀無常苦無我，寂滅心。

⑪觀空無相無願，無作心。 ⑫觀陰界入，多過患心。

⑬降伏煩惱，非伴侶心。 ⑭護諸善法，自伴侶心。

⑮抑制惡法，令除斷心。 ⑯修習正法，令增廣心。

⑰雖修二乘，常捨離心。 ⑱聞菩薩藏，樂奉行心。

⑲自利利他，隨順增進，諸善業心。 ⑳持真實行，求一切佛法心。

復次，菩薩修行智慧，復有十法善思惟心，不與聲聞辟支佛共。何謂為十？

①思惟分別定慧根本。 ②思惟不捨斷常二邊。

③思惟因緣生起諸法。 ④思惟無眾生我人壽命。

⑤思惟無三世去來住法。 ⑥思惟無發行而不斷因果。

⑦思惟法空而殖善不懈。 ⑧思惟無相而度眾生不廢。

⑨思惟無願而求菩提不離。 ⑩思惟無作而現受身不捨。

復次，菩薩復有十二善入法門。何謂十二？

- ①善入空等三昧而不取證。②善入諸禪三昧而不隨禪生。
③善入諸通智而不證無漏法。④善入內觀法而不證決定。
⑤善入觀一切眾生空寂而不捨大慈。⑥善入觀一切眾生無我而不捨大悲。
⑦善入生諸惡趣而非業故生。⑧善入離欲而不證離欲法。
⑨善入捨所欲樂而不捨法樂。⑩善入捨一切戲論諸覺而不捨方便諸觀。
⑪善入思量有為法多過患而不捨有為。⑫善入無為法清淨遠離而不住無為。

7 菩薩能修一切善入法門，即能善解三世空無所有。若作是觀，觀三世空智慧力故。若於三世諸佛所種無量功德，悉以迴向無上菩提，是名菩薩善觀三世方便。

復次，雖見過去盡法，不至未來，而常修善，精進不懈。觀未來法，雖無生出，不捨精進，願向菩提。觀現在法，雖念念滅，其心不忘發趣菩提。是名菩薩觀三世方便。過去已滅，未來未至，現在不住，雖如是觀，心心數法生滅散壞，而常不捨聚集善根助菩提法，是名菩薩觀三世方便。

14 復次，菩薩觀一切，善不善、我無我、實不實、空不空、世諦真諦、正定邪定、有為無為、有漏無漏、黑法白法、生死涅槃。如法界性，一相無相，此中無法可名無相，亦無有法以為無相，是則名為一切法印不可壞印。於是印中，亦無印相，是名真實智慧方便般若波羅蜜。

發菩提心菩薩摩訶薩，應如是學，應如是行。如是行者，即近阿耨多羅三藐三菩提。

菩薩摩訶薩修行智慧，心無所行，法性淨故。是則具足般若波羅蜜。

21 10 如實法門品

若善男子善女人，修習六波羅蜜，求阿耨多羅三藐三菩提者，應離七法。何等為七？

- ①離惡知識。惡知識者，所謂教人捨離上信上欲上精進，集眾雜行。
②離於女色。貪著嗜欲，狎習世人，而與執事。
③離於惡覺。自觀形容，貪惜愛重。染著守護，謂可久保。
④離於瞋恚、暴慢、嫉忌。興起諍訟，壞亂善心。
28 ⑤離於放逸、憍慢、懈怠。自恃小善，輕蔑於人。

⑥離於外道書論，及世俗文頌綺飾言辭。非佛所說，不應讚誦。

⑦不應親近邪見惡見。

如是七法，所應遠離。如來說言：不見更有餘法深障佛道，如此七法。是故菩薩應當遠離。

若欲疾得無上菩提，當修七法。何謂為七？

①菩薩當親近善知識。善知識者，所謂諸佛，及諸菩薩。若聲聞人，能令菩薩住深法藏諸波羅蜜，亦是菩薩善知識也。

②菩薩應當親近出家，亦當親近阿蘭若法。離於女色，及諸嗜欲。不與世人而共從事。

③菩薩應當自觀，形如糞土，但盛臭穢，風寒熱血，無可貪著。日當就死，宜思厭離，精勤修道。

④菩薩應當常行和忍恭敬柔順，亦勸化他人令住忍中。

⑤菩薩應當修集精進，常生慚愧，敬奉師長，憐愍窮下。見厄苦者，以身代之。

⑥菩薩應當修習方等大乘諸菩薩藏。佛所讚法，受持讀誦。

⑦菩薩應當親近修習第一義諦。所謂實相，一相無相。

若諸菩薩欲疾速得無上菩提，應當親近如是七法。

復次，若人發菩提心，以有所得故，於無量阿僧祇劫修集慈悲喜捨、布施、持戒、忍辱、精進、禪定、智慧。當知是人，不離生死，不向菩提。

何以故？有所得心，及諸得見。陰界入見、我見、人見、眾生見、壽命見。慈悲喜捨施戒忍進定智等見。

取要言之，佛法僧見及涅槃見。如是有所得見，即是執著心。執著者，是名邪見。

所以者何？邪見之人，輪轉三界，永離出要。是執著者，亦復如是。永離出要，終不能得阿耨多羅三藐三菩提。

若人發菩提心，應當觀察是心空相。何等是心？云何空相？

心名意識，即是識、陰、意入、眼界。心空相者，心無心相，亦無作者。

何以故？是心相空，無有作者，無使作者。若無作者，則無作相。若菩薩解

了如是法者，於一切法，即無執著。無執著故，於諸善惡，解無果報；於所習慈，了無有我；於所習悲，了無眾生；於所習喜，了無有命；於所習捨，了無有人；雖行布施，不見施物；雖行持戒，不見淨心；雖行忍辱，不見眾生；雖行精進，無離欲心；雖行禪學，無除惡心；雖行智慧，心無所行。於一切緣，皆是智慧，而不著智慧，不得智慧，不見智慧。行者如是修行智慧，而無所修亦無不修。為化眾生，現行六度，而內清淨。行者如是善修其心，於一念頃，所種善根，福德果報無量無邊，百千萬億阿僧祇劫，不可窮盡，自然得近阿耨多羅三藐三菩提。

11 空無相品

往昔一時，佛在迦蘭陀竹林，與諸大眾無量集會。

爾時，世尊宣正法，告諸大眾：如來所說：「諸法無性，空無所有。」一切世間，所難信解。

何以故？色無縛無解，受想行識無縛無解。色無相離諸相，受想行識無相離諸相。色無念離諸念，受想行識無念離諸念。眼色耳聲鼻香舌味身觸意法亦復如是。

無取、無捨、無垢、無淨；無去、無來、無向、無背；無闇、無明、無癡、無慧；非此岸、非彼岸、非中流。是名無縛。

無縛故空，空名無相，無相亦空，是名為空。

空名無念，無念亦空，是名為空。

空念亦空，是名為空。

空中，無善無惡，乃至亦無空相，是故名空。

菩薩若如是知陰界入性，即不取著，是名法忍。

菩薩如是忍故，得授記忍。

諸佛子！譬如有人，仰書虛空，悉寫如來十二部經。經無量劫，佛法已滅；求法之人，無所見聞；眾生顛倒，造惡無邊。復有他方淨智慧人，憐愍眾生，廣求佛法。行到於此，見空中字，文畫分明，即便識之。讀誦、受持，如所說行，廣演分別，利益眾生。此書空者，識空字人，可思議不？而得宣傳、修習受持、引導眾生，令離繫縛。

諸佛子！如來說言：

過去世時，求菩提道，得值三十三億九萬八千諸佛。爾時，皆為轉輪聖王，以一切樂具，供養諸佛及弟子眾。以有所得故，不得授記。

於後，復值八萬四千億九萬辟支佛，亦以四事盡形供養。

過是以後，復值六百二十萬一千二百六十一佛，爾時，皆為轉輪聖王，以一切樂具，盡形供養。諸佛滅後，起七寶塔，供養舍利。

7 後，佛出世奉迎，勸請轉正法輪，供養如是百千萬億諸佛。是諸如來，皆於空法中說諸法相。以有所得故，亦不得授記。

如是展轉，乃至得值然燈佛興。見佛聞法，即得一切無生法忍。得是忍已，乃得授記。然燈如來，於空法中，說諸法相，度脫無量百千眾生，而無所說，亦無所度。

牟尼世尊，興出於世，於空法中，說有文字，示教利喜，普得受行，而無所示，亦無受行。

14 當知是法，性相盡空。書者亦空，識者亦空。說者亦空，解者亦空。從本來空，未來亦空，現在亦空。而諸菩薩積集萬善方便力故，精勤不懈功德成滿，得阿耨多羅三藐三菩提。此實甚難，不可思議。於無法中，說諸法相。於無得中，說有得法。如此之事，諸佛境界。以無量智，乃可得解，非是思量所能得知。

新發意菩薩，誠心敬仰，愛樂菩提。信佛語故，漸能得入。

云何為信？信觀四諦，除諸煩惱妄見結縛，得阿羅漢。信觀十二因緣，滅除
21 無明生起諸行，得辟支佛。信修四無量心六波羅蜜，得阿耨多羅三藐三菩提。是名信忍。

眾生於無始生死，取相執著，不見法性。當先觀察自身五陰，假名眾生。是中，無我無有眾生。

何以故？若有我者，我應自在。而諸眾生，常為生老病死之所侵害，不得自在，

當知無我。無我即無作者，無作者亦無受者。法性清淨，如實常住。如是觀
28 察，未能究竟，是名順忍。

菩薩修信、順忍已，不久當成最上法忍。

12 功德持品

菩薩具足修無相心，而心未曾住於作業。是菩薩於諸業相，知而故作。為修善根，求菩提故，不捨有為。為諸眾生，修大悲故，不住無為。為一切佛真妙智故，不捨生死。為度無邊眾生令無餘故，不住涅槃。是名菩薩摩訶薩，深心求阿耨多羅三藐三菩提。

7 諸佛子！菩薩成就十法，終不退失無上菩提。何謂為十？

①菩薩深發無上菩提之心，教化眾生亦令發心。

②常樂見佛，以己所珍，奉施供養，深種善根。

③為求法故，以尊敬心，供養法師，聽法無厭。

④若見比丘僧，壞為二部，互起諍訟，共相過惡。勤求方便，令其和合。

⑤若見國土，邪惡增上，佛法欲壞。能讀誦說，乃至一偈，令法不絕，專心護法，不惜身命。

14 ⑥見諸眾生恐懼苦惱，為作救護，施以無畏。

⑦發勤修行，求如是等方等大乘甚深經法諸菩薩藏。

⑧得是法已，受持讀誦，如所說行，如所說住。

⑨自住於法，亦能勸導令多眾生入是法中。

⑩入法中已，能為解說，示教利喜，開悟眾生。

菩薩成就如是十法，於無上菩提，終不退失。

菩薩應當如是修行此經。如是經典，不可思議，所謂能生一切大慈悲種。

21 是經，能開悟引導具縛眾生，令其發心。

是經，能為向菩提者，而作生因。

是經，能成一切菩薩無動之行。

是經，能為過去未來現在諸佛之所護念。

若有善男子善女人，欲勤修集無上菩提，當廣宣流布如是經典，於閻浮提，使不斷絕，令無量無邊眾生得聞是經。若有善男子善女人，聞是經者，是諸人等，悉得猛利不可思議大智慧聚，不可稱量福德果報。

28 所以者何？是經，能開無量清淨慧眼，能令佛種相續不斷，能救無量苦惱眾

生，能照一切無明癡闇，能破四魔及諸魔業，能壞一切外道邪見，能滅一切煩惱大火，能消因緣生起諸行，能斷慳貪、破戒、瞋恚、懈怠、亂意、愚癡、六極重病，能除業障、報障、法障、煩惱障、諸見障、無明障、智障、習障。

取要言之，此經，能令一切惡法消滅無餘。能令一切善法熾然增長。

若有善男子善女人，聞是經已，歡喜愛樂，生希有心。當知是人，已曾供養無量諸佛，深種善根。

7 所以者何？此經，是三世諸佛之所履行。是故，行者得聞是經，當自慶幸，獲大善利。若有書寫讀誦此經，當知此人，所獲福報，無量無邊。

所以者何？此經所緣，無邊故。興發無量大誓願故，攝受一切諸眾生故，莊嚴無上大菩提故，所獲福報亦復如是無有限量。

若能解其義趣，如說修行。一切諸佛，於阿僧祇劫，以無盡智說其福報，亦不能盡。

若有法師說是經處，當知是中，便應起塔。

14 何以故？是真實正法，所出生處故。

是經，隨在國土城邑聚落寺廟精舍，當知是中，即有法身。

若人供養香花、伎樂、懸繒、幡蓋、歌唄、讚歎、合掌、恭敬。當知是人，已紹佛種，況復具足受持經者！

是諸人等，成就功德智慧莊嚴，於未來世，當得授記，決定當成阿耨多羅三藐三菩提。

發菩提心經論



香港新界屯門藍地青山公路18號妙法寺 <https://www.mfbm.hk>
18 Castle Peak Road, Lam Tei, Tuen Mun, N.T., Hong Kong